



جابتن مفتی نكري فرع

قوله تعالى:

فَسَأَلُوا أَهْلَ الْذِكْرِ إِنْ كُنْتُمْ لَا تَعْلَمُونَ

السلام عليكم ورحمة الله وبركاته

Soalan :

Assalamualaikum dan salam sejahtera,

Saya ingin bertanya akan hukum seorang pekedai emas mengenakan kos upah yang melampau dan sesuka hati mereka dalam urus niaga emas?

Untuk maklumat Tuan Mufti, jual beli emas di kedai kini mengenakan kos upah konvensional di kedai mereka, di mana tiada kadar kos upah ditetapkan atau dipamerkan. Yang menentukan kos upah itu ialah pekedai itu sendiri. Pembeli hanya tahu tentang kos upah ditetapkan berdasarkan reka bentuk dan berat. Itu pun hanya ketika mereka telah memilih item tersebut.

Pekedai pula menggunakan taktik tertentu seperti mempamerkan harga emas pergram yang rendah. Contohnya RM217/gram. Tapi kemudian bila pelanggan telah memilih item yang hendak dibeli, pekedai akan mengenakan kos upah yang tinggi sehingga harga emas tadi mencecah RM290/g ke RM320/g.

Ini menunjukkan kos upah tadi dimanipulasi oleh pekedai dengan mengenakan kos upah yang tinggi sesuka hati mereka supaya mereka mengaut keuntungan besar. Mereka tahu pelanggan akan cuba minta kurangkan harga. Jadi mereka sengaja letakkan kos upah

tinggi. Kemudian mereka akan kurangkan sedikit demi sedikit, kononnya cuba bertolak ansur. Hakikatnya mereka masih mengaut keuntungan yang besar dalam jual beli mereka. Jika berdasarkan uruf setempat, harga emas semasa adalah sekitar RM230 ke RM250 per gram. Namun kedai-kedai yang mengenakan kos upah ini tadi mengaut keuntungan sehingga RM290 ke RM320 per gram! Mereka mengejar keuntungan duniaawi tapi bukan reda Allah dalam muamalat berniaga. Mereka telah menipu pelanggan secara terang-terangan. Walaupun berlaku akad, tetapi kebanyakannya pelanggan hanya sedar harga per gram tinggi selepas pembelian dibuat. Ini amat mendukacitakan.

Bukankah urus niaga ini telah menjadi gharar berat kerana kos upahnya tidak jelas? Peniaga tidak langsung menetapkan kadarnya dan hanya mereka yang tahu kenapa kos itu sebanyak itu, namun pembeli hanya terima sahaja tanpa ukuran yang tepat. Akhirnya pembeli berasa telah tertipu dalam jual beli tadi.

Saya tertarik dengan sebuah kedai emas Makmur Gold di Kuantan yang mendapat sijil pematuhan syariah dari Angkasa. Kedai emas ini tidak mengenakan kos upah dalam urus niaga mereka atas nasihat panel syariah. Harga mereka juga tetap dan berlegar sekitar harga emas semasa. Kadar keuntungan mereka juga sudah ditetapkan. Bahkan sudah ada beberapa kedai lain yang mengikut jejak langkah sama. Cuma majoriti pekedai masih enggan kerana mereka berkata kaedah ini tidak menguntungkan.

Jadi saya fikir sudah sampai masa para pekedai emas Melayu Islam beralih ke urus niaga patuh syariah. Modelnya sudah ada. Ia patut diperluaskan sebagai jihad ekonomi orang Islam. Malangnya ada pekedai yang mencabar urus niaga patuh syariah ini kerana tidak ada mufti atau badan agama yang berani menegur.

Saya lampirkan beberapa tangkap layar di sebuah laman harga emas, yang mana beberapa pembeli telah ditipu pekedai melalui kos upah. Adalah wajar pejabat mufti menegur para pekedai ini agar beralih ke urus niaga patuh syariah supaya perniagaan lebih direndah Allah sebagaimana sabda Nabi:

"Peniaga yang boleh dipercayai dan amanah akan bersama para nabi, orang-orang yang dapat dipercayai (siddiqin) dan orang-orang yang mati syahid." [HR Tarmizi 1130]

Diharap Tuan Mufti dapat memberi penegahan kepada para pekedai agar mengelakkan penggunaan kos upah yang tidak jelas hingga mengakibatkan berlaku gharar, dan beralih ke urus niaga patuh syariah yang lebih berkat dan direndai Allah.

Wallahuallam.

NOOR KASMARA BIN MOHD SOKARNOR
KUALA ROMPIN, PAHANG
KP 800625065425
HP 0139760187

Jawapan :

وَعَلَيْكُمُ السَّلَامُ وَرَحْمَةُ اللهِ وَبَرَكَاتُهِ

Terima kasih atas soalan yang telah diajukan pada kami, mudah-mudahan kita semua sentiasa dalam limpahan rahmat Allah ﷺ. Dalam perundangan Islam hak mendapat gaji ataupun upah yang setimpal di kalangan orang yang bekerja telah pun termaktub. Upah maksud dari sudut syarak ialah balasan yang diterima hasil daripada kerja yang dibuat. Firman Allah ﷺ dalam surah Al-Kahfi ayat 77 berbunyi :

فَانظَلَقَا حَتَّىٰ إِذَا أَتَيَا أَهْلَ قَرْيَةٍ أَسْتَطَعُمَا أَهْلَهَا فَأَبْوَا أَن يُضَيِّقُوهُمَا فَوَجَدَا فِيهَا جِدَارًا يُرِيدُ أَن يَنْقَضَ فَأَقَامَهُ، قَالَ لَوْ شِئْتَ لَتَحْذِنَتْ عَلَيْهِ أَجْرًا

Bermaksud : "Kemudian keduanya berjalan lagi, sehingga apabila mereka sampai kepada penduduk sebuah bandar, mereka meminta makan kepada orang-orang di situ, lalu orang-orang itu enggan menjamu mereka. Kemudian mereka dapati di situ sebuah tembok yang hendak runtuh, lalu ia membinanya. Nabi Musa berkata: "Jika engkau mahu, tentulah engkau berhak mengambil upah mengenainya!"

Hadis daripada Anas bin Malik RA:

"غَلَ الْسِّعْرُ عَلَىٰ عَهْدِ رَسُولِ اللَّهِ صَلَّى اللَّهُ عَلَيْهِ وَسَلَّمَ فَقَالُوا يَا رَسُولَ اللَّهِ سَعَرْ لَنَا فَقَالَ إِنَّ اللَّهَ هُوَ الْمُسَعِّرُ
الْقَابِضُ الْبَاسِطُ الرَّزَاقُ وَإِنِّي لَأَرْجُو أَنْ أَلْقَى رَبِّي وَلَيْسَ أَحَدٌ مِنْكُمْ يَطْبُبُنِي بِمَظْلِمَةٍ فِي دَمٍ وَلَا مَالٍ"

Maksudnya: "Pernah terjadi kenaikan harga pada masa Rasulullah ﷺ, maka orang-orang berkata: Wahai Rasulullah, tetapkanlah harga untuk kami. Lalu Baginda bersabda: "Sesungguhnya Allah Sang Penetap Harga, Pengenggam, Pembentang dan Pemberi Rezeki. Aku berharap bertemu dengan Tuhanmu dan tidak ada seorang pun dari kalian yang menuntut perbuatan zalim yang aku pernah lakukan kepadanya, baik berupa darah (qisas) maupun harta."

Riwayat al-Tirmizhi (no.1235). Beliau berkata hadis ini hasan sahih.

Hadis ini adalah dalil bahawa haram bagi pemerintah untuk menetapkan harga barang mengikut pendapat yang muktamad dalam mazhab. Pendapat yang lemah mengatakan bahawa dibenarkan ke atas pemerintah untuk menetapkan harga pada waktu ghala' (gawat) bagi makanan. Sekiranya imam menetapkan harga barang dan peniaga menyelisihi perintah berkenaan, dibenarkan kepada pemerintah untuk mengenakan hukuman ta'zir kepadanya. Walau bagaimanapun, hukum jual beli itu adalah sahih, mengikut pendapat yang asah (lebih sahih). Rujuk al-Mu'tamad fi al-Fiqh al-Syafie (3/65-66) oleh Muhammad al-Zuhaili.

Berkata Syeikh Muhammad Taqi Uthmani: "Sesungguhnya tas'ir (penetapan harga barang) tidak boleh dilaksanakan, melainkan pada keadaan-keadaan yang luar biasa, apabila manusia berada dalam keadaan terdesak akibat harga yang terlalu ditinggi pada barang-barang yang manusia berhajat kepadanya seperti makanan, minuman dan pakaian. Jika tidak berlaku keadaan sedemikian, maka hukum asalnya hendaklah dibiarkan para peniaga dan pembeli untuk bermiaga berdasarkan harga yang mereka suka. Pada zahirnya, jika tidak berlaku ihtikar

(monopoli barang), dan tidak berlaku penetapan harga barang oleh kartel perniagaan, maka ini akan membuka peluang persaingan bebas dalam pasaran sehingga para peniaga tidak mungkin menaikkan harga lebih daripada harga pasaran. Jika naik sekali pun, maka kesamaran sudah pun hilang. Justeru tidak diperlukan kepada penetapan harga barang.”

Rujuk Fiqh al-Buyu` (2/1002)

Kami berpandangan berdasarkan hujah-hujah di atas, harus pekedai emas mengenakan kos upah yang tinggi kepada pembeli. Dan berlakunya perniagaan tersebut dalam bentuk saingen dengan kedai-kedai emas yang lain. Pokok pangkalnya bergantung kepada pembeli memilih mana yang terbaik untuk menjadikan emas yang dibelinya tersebut sebagai hak miliknya. Walaupun begitu, pekedai emas pun digalakkan supaya bertoleransi dalam menjalankan perniagaan dan banyakkan bersedekah, supaya perniagaannya sentiasa dilimpahi keberkatan daripada Allah ﷺ. Kerana berasaskan sabda Rasulullah ﷺ:

”يَا مَعْشَرَ التُّجَارِ إِنَّ الشَّيْطَانَ وَالإِنْسَانَ يَحْضُرُانِ الْبَيْعَ فَشُوُبُوا بَيْعَكُمْ بِالصَّدَقَةِ“

Maksudnya: “Wahai para peniaga! Sesungguhnya syaitan dan dosa itu hadir dalam aktiviti jual beli. Maka sucikanlah jual beli kamu dengan bersedekah.”

Riwayat al-Tirmizhi (no.1208) daripada Qays bin Abi Gharazah RA, dengan sanad hasan sahih.

Rujukan :

1. Al-Quran dan terjemahannya.
2. Hadis Imam At-Thirmizhi.
3. <https://muftiwp.gov.my/artikel/al-kafi-li-al-fatawi/2887-al-kafi-964-untung-berlipat-ganda-adakah-itu-riba>